

貴陽府志三十四

貴陽府志三十四

貴陽府志餘編卷之一

知貴陽府事秦和周作楫夢巖輯

知貴陽府事博白朱德璣綬堂刊

文徵

救

歐陽修 以下衆

賜西南蕃蠻人張漢頂等勅書

勅張漢頂省所附進馬并硃砂等事其悉汝世安邊
微達効款誠涉道里以甚勤修貢輸而自達載嘉忠
順宜有寵頒今回賜爾紅中錦旋襦一領八兩渾鍍

銀腰帶一條衣着十二疋至可領也故茲示諭想宜
知悉秋冷汝比好否遣書指不多及

內制集

賜西南番蠻人張光現等勅書

汝世守邊疆遠輸忠順時修職貢剛達欵誠載嘉勸
恪之心宜示褒優之錫

蘇軾

賜西南羅番進奉勅書

元祐二年九月三日

勅汝世爲要服時欵塞垣志慕華風來修職貢載惟
忠恪良用歎咨

疏

王憲 以下明

請忠烈廟南公祀典疏畧

臣聞以死勤事則祀之爲民禦災則祀之竊見貴州
城中舊有忠烈廟祀唐忠臣南霽雲洪武初都指揮
程暹建至今軍民皆稱其神神靈每歲春首風狂境
內常有火災及水旱疾疫蟲虎寇盜禱於神其應若
響雖神貺久孚人心而聖代未蒙祀典臣請考南霽
雲在唐天寶末安祿山爲亂賊將尹子奇圍睢陽守
將張巡許遠與之誓死拒戰嘗求救兵於賀蘭進明
初囑指示信已而城陷霽雲死之茲者顯靈八番陰

爲禦災捍患乞追賜美諡頒祀典每歲春秋有司致祭非惟聖恩廣布不遺前代之忠臣抑使神惠愈彰永濟邊方之黎庶

田秋

請開貴州鄉科疏

臣秋原籍貴州思南府人竊惟國家取士於兩京十二省各設鄉試科場以掄選俊才登之禮部爲之會試然後進於大廷命以官職眞得成周鄉舉里選之遺意所以人才輩出視古最盛惟貴州一省遠在西南未曾設有鄉試科場止附雲南布政司科舉蓋因

永樂年間初設布政司制度草創且以遠方之民文
教未盡及也迄今涵濡列聖休明之治教百五十餘
年而親承皇上維新之化又八年於茲遠方人才正
如在山之木得雨露之潤日有生長固非昔日之比
矣臣愚謂開科盛舉正有待於今日也且以貴州至
雲南相距二千餘里如思南永甯等衛且有三四千
里者而盛夏難行山路險峻瘴毒浸淫生儒赴試其
苦最極中間有貧寒而無以爲資者有幼弱而不能
徒行者有不耐辛苦而返於中道者至於中冒瘴毒
而疾於途次者往往有之此皆臣親見其苦親歷其

勞今幸叨列侍從乃得爲陛下陳之邊方下邑之士
望天門於萬里扼腕嘆息欲言而不能言者亦多矣
臣嘗聞國初兩廣亦共一科場其後各設鄉試解額
漸增至今人才之盛埒於中州臣竊以爲人性之善
得於天者本無遠近之殊特變通鼓舞之機由於人
者有先後耳今設科之後人益向學他日雲貴又安
知不若兩廣之盛乎議者曰科之不開病於錢糧之
少臣竊以爲不然蓋貴州雖赴雲南鄉試而舉人牌
坊之費貴州自辦也鹿鳴之宴貴州自備也今所加
者不過三場供給試官聘禮耳鎮遠永甯等稅課司

每歲不下數百兩思南府又有棉花稅若設一稅課
司委一廉幹府官監收之每歲亦可得數百兩只此
數頂足充其用況求才大事又可靳於區區之小費
乎且歷年撫按官亦屢有舉奏蓋一方之志願上下
之同情其建置之地區畫之詳在彼必有定議乞勅
該部再加詳議舊額二省共取五十五名雲南三十
四名貴州二十一名臣請於開科之後量增數名以
風勵遠人使知激勸則遠方幸甚

郭子章

題設新貴黃平等學疏

臣看得建學育賢化民成俗首務今據司道會議改
平越舊定二衛學爲平越安順二府學增設黃平州
新貴縣二學裁平越衛學訓導改黃平州學學正裁
宣慰司學訓導改新貴縣學教諭此一轉移間不煩
官帑允宜建設黃平州學除土司土著子弟照舊取
考外其新民子弟須照禮部題准近例三十年後方
准收考今據司道府會議黃平等州縣乃新造之邦
土著鮮少禮義不知新民子弟目前准其收考文理
平通者止許入學不許觀場待三十年方許入試既
不失化誨苗方之意又不礙冒籍中式之例似應俯

從其平越安順二府學廩額貢期俱照都勻府學例
各廩二十名一年一貢黃平州學准廩十名二年一
貢須在十年之後方准起貢二衛學印記當改爲二
府學印記至於增解額一節邇來文教漸昌庠序日
增且會試中式不下於粵滇而鄉試解額獨少於二
省似應於原額量加以廣聖化伏候睿鑒施行

田雯 以下 國朝

請建學疏

爲

聖治普洽宸區敬請修舉學制以隆文教事竊惟全黔薄

微退陬民苗雜居禮讓未興剽悍成習我

皇上道隆德盛典學崇儒文明光被而芹藻之子均沾教化秀頑之民咸沐恩澤固已彬彬稱盛矣臣忝任撫黔以敦崇學校爲先蓋學校之關係乃風俗人心之根本禮明樂備者猶將踵事增華簡略因循者曷不乘時興舉按永甯獨山麻哈三州貴筑普定平越都勻鎮遠安化龍泉銅仁永從九縣尙俱未設學校據該士子紛紛呈稟荒寒之士勵志芸窓登進無自臣借司道諸臣等議建學育才似不可緩凡一切庀材未敢仰需公帑而

題額并堂

御書首重前奉頒賜尙餘八幅理合籲懇

睿慈一視同仁

勅部再頒四幅以使製匾恭懇至於額進童生查貴筑爲
省會附郭之縣謹擬照大學考取十五名餘則概照
小學考取八名武生貢廩一循定例而行董率職官
貴筑應請訓導一員餘俱暫以附近教職兼攝俟人
文寢廣另議專官又按新添鎮西興隆烏撒赤水五
學近因裁衛歸併貴定清鎮黃平威甯畢節五學矣
夫合兩地之人才限一庠之定額爲數較窄生童進

取未免滯淹以故連名訴陳迄無止息臣思五衛舊學

御匾輝煌先師之所式憑諸生之所景附何可輕言汰併
自應照舊存習卽以貴定等五學教官董率之此確
有直隸延慶懷來之近例可援凡此者或畱舊學於
旣裁或議新庠於初創臣非敢過瀆

宸聰實以黔省窮荒固陋必崇文治而後可以正人心變
風俗非如他省化行俗美者比合應仰顙

聖化之隆仁義漸摩馴致士風之厚彼蠢爾有苗豈無俟
七旬而來格矣再照平溪清浪二衛學厯係黔屬思

州府提調應試貴陽不過五百餘里前因用兵之際
將驛站改屬楚南而學校隨之諸生應試東下武昌
迢遞川塗不下二千五六百里資斧旣艱而鼓柁洞
庭駭浪驚濤士心恒多畏阻臣赴任時身過其地同
聲呼籲云兩科以來從無一士能赴武昌應試者情
殊可憫應請復還黔屬就近提調之制以示作養緣
統係學制事情用敢類列陳情

閩興邦

請廣中額疏

爲同文之教澤已久遐方之人才漸盛懇請

題增鄉試中額以振文運而興文治事該臣看得黔
南邊地曩昔人文原自寥寥邇來我

皇上右文之化普洽寰區微臣仰體

聖德加意作人家絃戶誦實與往昔不同但黔粵兩省俱
稱邊服禮闈既同中右而鄉式中額多寡有差是以
紳衿潘驤等有怨祈具

題與廣西鄉試中式三十名之請但科舉增額事關
大典臣批布政司移會提學道查議今據布政使丹
達禮提學道僉事林麟焜詳稱黔南雖屬遐荒迄今
人文繁盛甲戌會試廣西止中一名貴州中至三名

以此較之貴州人文盛於廣西可知似應照廣西之例增額取中詳請具

題前來臣伏念全黔邊徼儒士彬彬詩書陶淑莫非聖化之隆增額掄才必收得人之效甲戌禮闈三名得第足徵菁莪化洽黔疆俊彥卓冠西粵似可仰邀

聖恩一視同仁俯照廣西解額取中三十名將仕進之途旣寬誦讀之士愈奮邊地文風日益振興矣

請表精忠以隆祀典疏

爲請表精忠以光祀祀以昭國典事該臣看得舍生取義臣節克勵乎艱危殺身成仁公論共彰乎激烈

原任總督臣甘文焜者灕溪江上父子北面以全忠
原任將軍臣王之鼎者永甯城下孤軍穴陷而完節
慷慨一時流芳百世屢沐

聖主加銜錫謚之恩至啟輿情建祠致祭之請茲據黔屬
紳士人等請照閩省督臣范承謨等之事例於殉難
之地聿新廟貌永垂俎豆昭示旂常等情籲懇前來
臣批司道議覆衆論僉同如出一口所當援例
題請建祠致祭以彰我

皇上褒顯忠貞之盛典以慰幽魂於奕世者也

王繼文